

մեջ բացատրություն է տված, որ Մովսեսն յուր տնով է նվեր տված, «որ կոռին հողն բանեցնէ» և ԱՌԳԱՒԻՆՆ (կասկածելի է վերածանությունը) հաշուին աղ բէրէ»:

Նշանակում է, Մովսեսին տվել են վանքին, որ կոռի հողը մշակի և աղ բերի: Բայց ո՞րն է կոռի հողը, վանքապատկան հողն է կոռով մշակվել և այդ պատճառով կոռի հող կոչվել, թե ուրիշ իմաստ ունի, չի պարզվում: Առայժմ անհնարին է մեկ երկու արձանագրական տվյալներով լուծել այդ հարցերը: Պետք է նյութը շատ լինի, որ համեմատության դրվի և լուծվի:

Միանգամայն իրավացի է ընկ. Պողոսյանը, երբ ասում է, որ մինչև մոնղոլների արշավանքը հայ գյուղացին անձնապես կախման մեջ չի գտնվել Ֆեոդալից: Տեոդալները Սանահնին բազմաթիվ գյուղեր են նվիրել, իրենց հողերով, լեռներով ու դաշտերով, ջրով ու ջրաղացով, կամ գյուղը նվիրել են իր եռանդամբ: Համազասպանց Սմբատա որդի Համլիկը 1229 թվականին Կիււաշեն գյուղը նվիրել է Սանահնի վանքին իւր եռանդամբ, այսինքն գյուղն իր սահմանի մեջ ունեցած բոլոր հողերով, բայց մարդկանց կամ այդ գյուղի բնակիչների մասին խոսք չկա:

Ինչպես հայտնի է մի շարք արձանագրություններից, Հալալաշեն գյուղը պատկանել է Սանահնի վանքին, բայց № 15 արձանագրությամբ Դավիթ Շոթոռկա որդին մի հալալաշենցի շինական է նվիրել վանքին: Դա նշանակում է, որ վանքապատկան այդ գյուղի մյուս բոլոր բնակիչները թեև ապրել են գյուղում, այսինքն Հալալաշենի բնակիչներ են հանդիսացել, բայց անձնապես կախում չեն ունեցել վանքից: Վանքից անձնապես կախում է ունեցել միայն այն մի մարդը, որի մասին գրվել է վերոհիշյալ արձանագրության մեջ:

Վանքին նվիրվող հատ ու կենտ մշակներն ու շինականները սովորական պայմաններում գտնվող գյուղացիներ չեն, այլ ինչ որ արտակարգ պայմաններում գտնվող, անձնական ազատությունից զուրկ մարդիկ, որի հետևանքով նրանք կարող են ծախվել ուրիշի: Եթե գյուղացին անձնապես կախյալ վիճակում գտնվեր Ֆեոդալից, այդ դեպքում գյուղի հետ միասին վանքին կնվիրեին նաև գյուղի բնակիչներին:

Գյուղացիները կալվածատիրոջ պատկանող գյուղում ապրելու համար միայն հարկեր են վճարել և հարկադիր աշխատանք կատարել իրենց տիրոջ համար մինչև մոնղոլական տիրապետության շրջանը: Հետզհետե վատթարանում է գյուղացիության վիճակը, նրա իրավունքներն այն աստիճան են սահմանափակվում, որ հողի և գյուղի հետ միասին սկսում են ծախել և նվիրել նաև գյուղի բնակչությունը: Դրան օրինակ կարող է ծառայել Սանահնի 15-րդ դարի վերջերքին պատկանող մի արձանագրություն, որի մեջ վանքի առաջնորդ Արղությանց Բարսեղ եպիսկոպոսը մի շարք հողամասեր, ջրաղացներ, այգիներ, գյուղեր և այլ շարժական ու անշարժ գույք նվիրելուց հետո ավելացնում է, որ տվել է նաև Բ գեղ շինական Սաճահնու սուրբ Աստուածածնիս: Այստեղ ևս թեև անհասկանալի որոշ բաներ կան, բայց կասկածից զուրկ է, որ երկու գյուղի բնակիչ է նվիրել վանքին: Արձանագրության մեջ անհասկանալի է, թե ո՞ր գյուղերի շինականներն են նվիրաբերվել վանքին, շինականների ընդհանուր թիվը որքա՞ն է, ինչու՞ այլ տեղերում այդպիսի բովանդակությամբ արձանագրությունների չենք հանդիպում, թեկուզ 15-րդ դարում և այլն:

Սրանք խնդիրներ են, որոնք թեպետ առայժմ չեն լուծվում, բայց վիմական արձանագրությունների հրատարակության հետ զուգահեռաբար պետք է քննարկվեն և պարզաբանվեն:

Սանահնի և Հաղբատի իրար մոտ գտնվելու հետևանքով, հաճախ նրանց մեջ վեճեր են ծագել վանական սեփականության շուրջը: Դրանցից ամենամեծը կարելի է համարել այն կռիվը, որ առաջացել էր երկու վանքերի միջև հաղբատցիների շինած բերդի առթիվ: Այդ կռիվը դադարեցնելու համար միջամտել են նույնիսկ Զաքարյան իշխանները: Այդ դեպքերի մանրամասն նկարագրերը տվել է Կիրակոս Գանձակեցին: Նա պատմում է, որ Հաղբատա վանքի վանահայր Հովհաննեսը, որ Զաքարեի և Իվանեի քեռորդին էր, Հաղբատի և Սանահնի միջև ընկած տարածության վրա մի ամրոց է շինել, որպեսզի պատերազմների ժամանակ այնտեղ պահի Հաղբատի ս. Նշանը և պատրասարի միաբաններին: